

Tau'n Anfang

Von Paul Arlinghaus

Plattdütsch wör ehre Heimat



De Ministerpräsident (Christian Wulf) is beindruckt von Paulas Gedicht. De Langweger tau Beseuk bien Landtag in Hannover 2004.

Veele van jau hebbt se sicher noch kennt: Aodams Paula (Paula Espelage) ut Langwege. Inn August isse storben mit 94 Jaohr.

Sei heff sick in ehr Läben masse innsett: för ehre Familie, för ehre Buurskupp un för anner Lüe. De plattdütsche Spraake leeg ehr dorbi besonders an't Hette un et wör ehr immer wichtig, dei unnere Lüe tau bringen. Besonders in Öller, at se mehr Tied ha, kööm et ehr togaue, dat se sick noch an so veeles erinnern kunn: an ehre Kindheit, an ehre Poststelle un an ehre Grootfamilie mit 11 Personen. Ut dei Tied heff se masse lütke Geschichten un Dönkes uppschräben: de sei erleevt heff un de ehr so infalln sind.

Ein plattdütschen Vördrag von Aodams Paula hörde öwer Jaohre tau veele gesellige Veranstaltungen inne ganze Gemeinde Dinklaoge. Mit „Aodams Paula vertellt ut ehr Läben“ un „Min leiwet Langwege un sine Lüe“ sind van Dinklaoger Heimatverein twei Bäuker upp Platt mit Geschichten, Gedichten un Dönkes von Paula Espelage herutbrocht woorn. Dormit bliff sei us immer in gaue Erinnerung. De plattdütsche Spraake pfelegen, dormit se us erhoorn bliff, is uk vör usen Heimatverein ein grootet Anliegen vör de nächsten Jaohre. Ahle Leeser von usen Utkiek wünsche ick veel Freide un vergeet nich, plattdütsch tau schnacken!

Frohe besinnlicke Wiehnachtsdaoge un ein gesundet Neiet Jaohr!